

www.BibleForChildren.org

San Marcos 26



Te nuu ja'ni
ka ña iñu kiuu
ja kitna'a viko
pascua, te ni ja'an
Jesús ñuu Betania
nuu oo Lázaro, tee ni ji'i,
te ni ndateku de ne'u ndiyi.
Yun te ni kunda'a María sava
litro tatna xiko ja kuu
ndimaa ita nardo ja ndee
ya'u ndeva'a, te ni joso ña
si'in Jesús, te ni ndasichi ña jin
ixi xini ña, te vi ninii ini ve'e ni chitu
xiko tatna yun.



Yun te kua'an Judas Iscariote, in tee ka skua'a jin ya ja kuu ndi uxi uu de, ja vi ndatno'o tna'a de jin sutu ka kuu nija'nu naxa kokuu ja xtuu de Jesús.

Te nuu ni ka onini sutu ka kuu nija'nu yun ja siun jiña'a de, te ni ka kusii ini de, te ni ka kee yu'u de ja vi kuña'a de xu'un. Yun te ni jinkondee Judas nduku de naxa kuu ja xtuu de Jesús nuu nda'a sutu ka kuu nija'nu yun.




Yun te ni ka sa'a tee ka skua'a jin
ya nagua ni tatnuni ya, te ni ka
sava'a de ja vi kaxini ya jin de viko
pascua yun. Te vi nini ka jaa de jin ya
xtaa, te ni tnii ya xtaa vixin yun, te ni
ndakuanta'u ya nuu ia Dios, te ni ta'u
ya, te ni jiña'a ya nuu tee ka skua'a jin
ya, te jiña'a ya: –Vi tnii ni te vi kaa ni,
chi ya'a kuu yiki kuñu san.




Yun te ni tnii ya vasu nuu ñu'u vinu,
te ni ndakuanta'u ya nuu ia Dios,
te ni sia'a ya vasu yun, te jiña'a
ya: –Ndi'i ni vi ko'o vinu ñu'u nuu
vasu ya'a. Chi ya'a kuu niñi san ja
soko san ja kokuu in tratu jaa, te
kati ja ja'a kua'a ñayiu nagua ja
koneka'nu ini ia Dios yika kuechi.



Yun te jiña'a ya nuu Simón Pedro: –Simón, ni jikan ña Tachi nuu ia Dios ja koto tnuni ña jin ndi'i ni, te kisi ña na kuinio nuu ka sijin triu. Su ni jikanta'u san ja ja'a ni nuu ia Dios, nagua ja ma ndayu'u ni jin tno'o kandija ni. Te nuu na ndajiokuiin ni nuu san, te suni chituu ni sava ka ñayiu ka kandija ja na vi koyutnui nuu san –jiña'a ya.



Te jiña'a Simón Pedro: –Jito'o san, sein chi ja ni jakin san anu san ja kondikin ña san ki'inkueio vekaa, vi guaa ndee na kuu san jin ni –jiña'a de. Yun te jiña'a Jesús: –Pedro, ka'an san ja vi jakuaa vitna, te uni jichi ka'an ni ja tu jini ña ni ama ka ja kana li'li –jiña'a ya.



Yun te kua'ankuei ya jin tee
ka skua'a jin ya, te ni
jinokuei ya in nuu nani
Getsemani, te jiña'a
ya: –Vi jinkoo ni ya'a
nini ki'in san yun na
ndakuatu san –jiña'a ya. Te
jiña'a ya: –Tata maa san,
ndi'i ni ja kuu ja sa'a maa ni,
xtajioo ni tnundo'o ndeva'a ja
vaji siki san. Su ma kokuu
nagua ka'an maa san, chi na
kokuu nagua kuini maa ni
–jiña'a ya.



JYun te ni jino Judas jin soldado vi policia ka jito veñu'u, ja ni ka tetniuu ña sutu ka kuu nija'nu vi tee ka kuu fariseo, ka ndiso xeen de, te ka tnuu de linterna vi ñu'u iti. Yun te ni xtuji in de in tee jinokuechi nuu sutu kuu nija'nu, chi ni kindee de so'o lado kua'a tee yun. Yun te jiña'a Jesús: –Saa ni, ma vi sa'a ka ni siun –jiña'a ya. Te ni tetuu ya nda'a ya so'o tee ni tuji yun, te ni nduva'a.



Yun te ni ka tnii de ya, te kua'ankuei de jin ya ve'e sutu kuu nija'nu ka. Te Pedro, chi ndikin jika ni de, kua'an de. Te nuu ni jinokuei de, te ni ka xtna'a de ñu'u ye'e yun, te ni ka jinkoo de ka ndasaa de. Te suni ni jintna'a Pedro, te ni jinkoo de ne'u nuu ka oo tee yun.



Yun te ni jikan tno'o ña in
tee jinokuechi nuu sutu
kuu nija'nu ka, in tee
kuu tna'a tee xiin so'o
ni ja'nde Pedro, te jiña'a
de: –¿A masu ni jini ña
san jin ni ja ka ndeka tna'a
ni jin de ne'u xtnuu kuu yun?
–jiña'a de. Te tu ni ndaa tuku
yu'u de ja jini de ya, te vi ore
saa ni kana in li'li. Yun te ni ndee
de ye'e yun, te ni jaku ndeva'a
de ja tna'u ini de.





Yun te ni ndontakuei ndi'i ñayiu ni ka oo nuu junta yun. Te ni ka jinsia'a de Jesús nuu Pilato. Yun te ni jikan tno'o ña Pilato: –¿A suu ron kuu rey ñayiu judio? –jiña'a de. Te jiña'a Jesús: –Saa ka'an maa ni –jiña'a ya. Su Pilato, chi ni kuini de ja siaa de Jesús, te ni ka'an tuku de jin ñayiu. Su vi saa vi'i ka ni

ka kana jaa ñayiu, te ka jiña'i: –¡Katakaa ni de! ¡Katakaa ni de

yika cruz! –ka jiña'i.




Yun te ni ndakuña'a ña Pilato jin Jesús
ja vi katakaa ña de jin ya yika cruz. Te
ni ka tnii ña de kua'ankuei de jin ya. Yun
te ni kee Jesús ndiso maa ya cruz,
kua'an ya in nuu nani yiki xini ndiyi, te
jin sa'an hebreo nani Gólgota.



Te yun ni ka jatakaa de ya yika cruz, te
xiin ya ni ka jatakaa de uu tee nuu uu ka
cruz, in in de jioo jioo xiin ya, te maa
Jesús ma'ñu.



Ni kune'e nuu nikandii, te ni te'nde sagua sa'un ka'nu ja
ndesi nuu ii, ini veñu'u ka'nu Jerusalén. Te yun ni kana
jaa Jesús, te jiña'a ya: –Tata, ndiunda'a maa ni anu san
–jiña'a ya. Te nuu ni ndi'i ni ka'an
ya tno'o yun, te ni
kana anu ya.



Te nuu makunee, te ja siun kiuu ka
sava'a kuu, chi ja ni kuyatni ja
ndaki'in kiuu ndatatu, te ni jino
José tee ñuu Arimatea, ja
kuu de in tee kuu nija'nu
nuu ka ndututu tee ka
ndanuu, te suni
ndetu ka'nu de ja
tatnuni ia Dios
ñuyiu.



Te vi ni ini ni anu de ni kiuu de nuu
oo Pilato, te ni ndakan de yiki
kuñu Jesús ja tayu'u de. Te ni
jaan José in sa'un kuijin vii
ndeva'a, te ni nune'e de
yiki kuñu ya, te ni
tniutuu de sa'un
yun.

Te ni ja'an de ni
tayu'u ña de in yau
ñaña ja ni kaan de in
yika kava ndee ja oo
kiuu, te ni jasi de in
kava ka'nu yu'u yau
yun.



Te inka kiuu ja kuu kiuu ndatatu, ni ka
ndututu tee ka kuu nija'nu
nuu sutu vi tee ka kuu
fariseo nuu oo Pilato.
Te ka jiña'a de: –Ka
ndaka'an san, vi jito'o
san, ja nuu ni oteku
tee tno'o yun, ni
ka'an de ja nuu

uni kiuu, te
ndateku de.



Yun te kua'ankuei de, te ni ka sa'a
kutu gua'a de yau ñaña
yun, te ni ka jasi de jin
ñuma jioo jioo xiin
kava yun ja kuu seyu,
te ni ka xndoo de
soldado ja vi
kokoto de.



Yun te nuu ni ya'a kiuu ndatatu, te nuu
matuu domingu, kiuu xtnañu'u ja
ndaki'in semana, kua'ankuei
María Magdalena vi inka
María ja vi kondia'a ña
yau ñaña nuu yiyu'u
Jesús. Te vi sanaa
ni, te ni tnaa xeen
ndeva'a, chi ni

kunjino in ia
jinokuechi nuu maa
Jito'o Dios ja ni kuun ya
ichi andivi, te ni jino ya
nuu oo yau ñaña yun, te
ni xtajioo ya kava ndesi
yun, te ni jinkoo ya
siki.



Te nuu ni ka jini ña tee ka jito yau
ñaña yun, te vi sua'a ka kisi de
ja ka yu'u ndeva'a de. Te ni
ka kendoo de na
kuinio ndiyi.



Te jiña'a ia jinokuechi nuu Dios nuu ñasi'i yun: –Ma vi yu'u ron, chi ja jini rin ja ka ndanduku ron Jesús, ia ni intakaa yika cruz. Te tu ka ya oo ya'a, chi ja ni ndateku ya, nagua ni oka'an ya. Ne'ekuei te vi kondia'a ron nuu ni okatuu ya.




Yun te ni ndekuei ñama ña yau ñaña yun,
te vi joo ka yu'u ña vi ka kusii ndeva'a ini
ña. Te ni ka jino ña kuano'okuei ña
ja vi kaxtno'o ña nuu tee ni ka
oskua'a jin Jesús. Te vi nini
kuano'okuei ña ja vi kaxtno'o
ña nuu de, te sanaa ni ka
nukuntna'a ña jin Jesús.



Te jiña'a ya: –Ka oo va'a ni, kua'a. Yun te
ni ka jintna'a ña ña jin ya, te ni ka
kanu ni'nu ña si'in ya, te ni ka
chiñu'u ña jin ya.





Te sandi'i ni ka, te ni ndenta ya nuu ndi uxi in tee ka skua'a jin ya, nuu ka nukoo de nuu mesa ka jaa de xtaa. Te ni kuxeen ya nuu de ja tu ka kandija de vi ja inu ndee ini anu de, ja tu ni ka kandija de tno'o ni ka ndakani ñayiu ni ka jini ña jin ya ja ni ndateku ya. Te nuu ni ndi'i ni ka'an Jito'o Jesús jin tee ka skua'a jin ya, te mandaa ya andivi kuano'o ya, te ni jinkoo ya ichi nda'a kua'a maa ia Dios.



'Chi ni kutoo ndeva'a ña ia Dios jin
ñayiu ñuyiu, yun guaa ni jiña'a ya
invaa Se'e ya, nagua ja ndi'i ñayiu
ka kandija ña jin ya ma vi junai,
chi vi ni'i ja vi kotekui nikuii nikani.



Romanos 3:23 Chi ndi'o ni ka sa'a yika kuechi, te ni ka kuu jikao nuu ye'e tajan ia Dios.

Romanos 6:23 Chi ya'u ja ka ni'o ja ka sa'o yika kuechi kuu ja vi kuo, su ja skuta'u ña ia Dios kuu ja vi kotekuo nikuii nikani jin Jito'o Jesukristu.

Hebreos 9:27 Saa nagua ka ji'i ndi'i ñayiu invaa ni jichi, yun te kua'ankuei ja ka'nde ia Dios kuechi.

Efesios 2:8,9 Chi ni ka'an nda'u ni ka'an kee ña ia Dios jion, ja ni skaku ni'nu ña ya jin ma'ñu sagua ja ka kandijao. Te masu in ja vaji nuu mao kuu, chi in java'a ja ni skuta'u ña ia Dios kuu. Te masu jin tniuu gua'a ja ka sa'o kuu ja skaku ni'nu ña, nagua ja ni in ñayiu ma vi kokuu teyii jin tniuu gua'a ka sa'i.



Romanos 10:9,10 Chi nuu ja jin yu'u ni na'ma ni ja Jesús kuu Jito'o ni, te kandija ni jin anu ni ja ia Dios ni ndaxteku ya ne'u ndiyi, te kaku ni'nu ni. Chi jin anuo kandijao nagua ja kokuo ñayiu ndaa, te jin yu'o na'mao ja Jesús kuu Jito'o, nagua ja skaku ni'nu ña ya.

San Juan 3:16,17 'Chi ni kutoo ndeva'a ña ia Dios jin ñayiu ñuyiu, yun guaa ni jiña'a ya invaa Se'e ya, nagua ja ndi'i ñayiu ka kandija ña jin ya ma vi junai, chi vi ni'i ja vi kotekui nikuii nikani. Chi tu ni tetniuu ia Dios Se'e ya ñuyiu ja xtavi kuechi ya ñayiu ñuyiu, chi ni tetniuu ña ya nagua ja vi kaku ni'nu ñayiu ñuyiu jin ma'ñu sagua ya.



1 Juan 5:11-13 Te ya'a kuu tno'o ndaa ja ndakani maa ia Dios: ja taa ya ja vi kotekuo nikuii nikani, te jin ma'ñu sagua Se'e ya vi ni'o ja vi kotekuo. Chi ñayiu oo jin Se'e ia Dios, te kotekui nikuii nikani, su ñayiu ja tu oo jin Se'e ya, te ma kotekui. Tno'o ya'a ni tee san nuu in in ni ja ka kandija ni sivi Se'e ia Dios, nagua ja vi kuni ni ja vi koteku ni nikuii nikani.



San Mateo 26-28; San Lucas 22-24;
San Juan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Mixtec, Northern Tlaxiaco Bible (xtn) © 2016, Wycliffe Bible
Translators, Inc. All rights reserved.

<https://live.bible.is/bible/XTNTBL/GEN/1>

©2025 Bible for Children, Inc.

www.M1914.org

www.bibleforchildren.org

